

Su'esu'ega Fa'apitoa a le A'oga a [Dilworth](#) - Samoan

# Aotelega o fa'amatalaga



# Aotelega o fa'amatalaga

## Aiaiga o Galuega Fa'atino

O aiaiga o galuega fa'atino e mo'omia ai lo matou faia o ni su'esu'ega ma ni fa'ai'uga i lalo o ni autu lautele se fa:<sup>1</sup>

- o le natura ma le lautele o sauaga tau feusua'iga fai fa'amalosi ma isi itu'aiga sauaga
- ni vaega na mafua ai pe na fesoasoani i le tula'i mai o nei sauaga
- ni gaioiga ma fa'atinoga e le'i faia e le a'oga, le au tausii mavaega, le pulega ma le afaigaluega e tali atu ai, pe fa'atalatalanoa ai ni faitioga e fa'asino i sauaga
- pe o talafegai ta'iala ma faiga fa'avae a le A'oga a Dilworth i le taimi nei e puipuia ai le toe tula'i mai o nisi sauaga i le lumana'i.

## O le ugia o lenei lipoti

O lenei lipoti e tali ai fesili o lo'o tu'uina mai i aiaiga o galuega fa'atino. O lo'o fua lea i la matou au'ililiga o fa'amatalaga na tu'uina mai e le Su'esu'ega Fa'apitoa mai se aofa'i e 175 o tama tuai o le a'oga; 30 sui o aiga, o nisi sa fai ma sui o tama tuai o le a'oga ua maliliu; silia ma le 100 tagata sa fa'afaigaluega e le A'oga a Dilworth pe na iai ni so'otaga va va lalata ma le a'oga, e aofia ai ni pule a'oga o lo'o soifua pea, 10 mai le 13 o tausii mavaega o lo'o soifua pea, ma tagata faigaluega mai le Ekalesia Egelani. O la matou au'ililiga e aofia ai se toe iloiloga loloto o nisi o pepa o fa'amatalaga. O le fa'anoanoaga, o ni fa'amaumauga o lapata'iga ma faiga leai se fa'amasinogatonu, matou te fa'ailoa atu ai fo'i ni mafatiaga o le a feagai ma i latou uma o lo'o aofia i le fa'alapotopotoga aotele a le A'oga a Dilworth.

## O ni vaega e le o aofia i lenei lipoti

E tusa ai ma fa'amaumauga a le A'oga a Dilworth, o le aofa'i o le lola o tamaiti a'oga i le piliota o lo'o iloiloaina e 4,693.<sup>2</sup> E le o aofia ai i lenei lipoti, ni a'afiaga o isi tamaiti a'oga sa ao'oga i le piliota o lo'o iloiloaina ma e le'i talanoa ane i le Su'esu'ega Fa'apitoa. Matou te fa'ailoa atu le to'atele o faia'oga alolofa, talenia ma agava'a na matou talanoa ma fa'alogo iai fa'apea tamaiti a'oga na maua ni galuega lelei, lumana'i manuia ma aiga lelei i le tu'ua ai o le A'oga a Dilworth ma sa latou lagona le tele o sa latou aitalafu i le a'oga.

1 Su'esu'ega Fa'apitoa i Sauaga i le A'oga a Dilworth, Tu'utu'uga o Fa'asinomaga, 2022. O nei vaega e maua i le fa'aopoopoga 1 o lenei lipoti.

2 O fa'amatalaga na tu'uina mai e le A'oga a Dilworth i le Su'esu'ega Fa'apitoa, Aso 30 o Iuni 2023. E le'i su'esu'eina pe fa'amaonia tuto'atasi e le Su'esu'ega Fa'apitoa nei fa'amatalaga.

## Fa'aapefea ona matou fa'atinoina le Su'esu'ega Faapitoa

O lenei Su'esu'ega Fa'apitoa na fa'atulagaina e le Fono Fa'atonu a le A'oga a Dilworth e ta'ita'ia lea e loia ma e tuto'atasi ese mai i le Fono Fa'atonu. Na a'oa'oina loia e mulimuli ma malamalama i faiga fa'avae o le le fa'aitu'au, amiotonu ma le tuto'atasi, ma o lenei a'oa'oga e taua tele a o matou su'esu'eina mea na mafua ai ona fa'atula'i mai le Su'esu'ega Fa'apitoa. O tagata faigaluega na fa'afaigaluegaina e fesoasoani ia i matou e pei o loia, tagata su'esu'e ma tagata faigaluega lagolago i le ofisa sa ta'alaina uma e nei faiga fa'avae, ma sa matou sa'ilia auala e fa'atumauina ai le maualuga o le puipuiga o fa'amatalaga fa'alilolilo ma le malu puipuia.

I le silafia ai e le Su'esu'ega Fa'apitoa o le a'afia o lagona pe a toe fa'atalanoaina sauaga na feagai ai, o lea na latou fa'aaogaina ai ni auala e pei o le taula'i i e na fa'asaoina mai i sauaga ma le fa'ailoaina o manu'aga i feso'ota'iga sa faia ma tama tuai lea na lipotia mai le sauaina ma fa'atulagaina ai loa ma ni auala fesoasoani mo lo latou ola manuia. Na fa'ateia fo'i matou i le leai o se fa'atuatuaga i le ta'ita'iga o le a'oga ma le Fono Fa'atonu, e pei ona fa'ailoa mai e le to'atele o tama tuai, na mafua ai ona so'ona atuatuva le to'atele o i latou.

So'o se tasi na fia auai i le Su'esu'ega Fa'apitoa sa feso'ota'i ane i le upegatafa'ilagi, telefoni ma le tuatusi sa fa'ailoaina fa'alaua'itele. O le tele sa fa'atalatalanoa. O nisi o tagata na galulue i taimi ua tuana'i i le a'oga ma tama tuai fa'apea ma le tele o nisi tagata sa fa'afeso'ota'i pe afai na ia i latou ni fa'amatalaga talafeagai. E leai se tama tuai na fa'afeso'ota'i e fesiligia pe na sauaina. I lona aotelega, na fa'atautaia e le Su'esu'ega Fa'apitoa ni fa'atalanoaga se 416 ma tusia ni fa'amatalaga tusitusia e 265.

Matou te fa'ailoa atili atu faiga fa'avae a le Su'esu'ega Fa'apitoa i le Mata'upu 2.

## A'oga a Dilworth

O le A'oga a Dilworth sa fa'avaeina o se a'oga nofo tumau mo tama i le tausaga e 1906. O lona fa'amoemoega tonu o le fesoasoani lea i tamaiti e le tagolima o latou aiga ina ia avea ma tagatanu'u lelei toe aoga. E ta'ita'ia le a'oga e le pule a'oga. O se faife'au na te ta'alaina tamaiti a'oga i le fa'atuatuaga Egelani.

E to'aono sui o le Fono Fa'atonu a le A'oga a Dilworth. Talu mai lona fa'avaeina, o le matafaioi muamua a le Fono Fa'atonu a le A'oga a Dilworth o le va'aia lea o ana aseta.

E talia tamaiti a'oga i le A'oga a Dilworth i lalo o aiaiga o le mavaega a James Dilworth ma e leai ni pili a'oga. E tele lava ina laiti tausaga o tamaiti, pe ta'i 8 pe ta'i 9 tausaga le matutua, i le taimi na amata nofo tumau ai i le a'oga. O le to'atele na o atu i le a'oga i le mae'a ai o ni fa'afitauli i o latou aiga, ni manunu'a tuga pe mama'i tigaina matua, maliu, tete'a pe soloia fa'aipoipoga, ma le to'atele ua leai ni o latou tama.

E ui ina na maitauina le tele o le suiga o le matafaioi a le Fono Fa'atonu i totonu o le luasefulu tausaga ua tuana'i, o le tele o le taimi sa latou va'aia ai tamaiti a'oga i lalo o le tausiga a le a'oga ma sa la'itiiti pe leai ai fo'i ma se feutaga'iga ma matua.

I lona avea ai ma se a'oga tuto'atasi, e la'itiiti lava se va'ava'aiga o le A'oga a Dilworth e le malo. Matou te fa'ailoa atu le auivi o le tulafono na fa'aaoga e le A'oga a Dilworth i le piliota atoa o le lipoti i le mata'upu 8.

# Natura ma le lautele o sauaga tau feusua'iga fai fa'amalosi ma sauaga fa'ao'olima tuga mai le Aso 1 o Ianuari 1950 e o'o i a Iulai 2023

O le au'iliiiliina o tali o lo'o fa'aalia i le mata'upu 3 e o'o i le 6 ma le mata'upu 9 o vaitau o pule a'oga: Mr John Conolly, 1951 e o'o i le 1966; Mr Peter Parr, 1967 e o'o i le 1979; Dr Murray Wilton, 1979 e o'o i le 1997; Mr Donald MacLean, 1997 e o'o i le 2018; ma Mr Dan Reddiex, 2019 e o'o mai i le aso.

## Sauaga tau feusua'iga fai fa'amalosi

Lautele o sauaga tau feusua'iga fai fa'amalosi

O sauaga tau feusua'iga fai fa'amalosi e le o fa'auigaina i totonu o le tulafono. Mo lenei Su'esu'ega Fa'apitoa, o le uiga o le fa'apuga o le 'sauaga tau feusua'iga fai fa'amalosi i tamaiti' ua fa'auigaina ia aofia ai gaoigaga o le pa'itino, e pei o le tago, kisi, lotelote ma gaoigaga tau pa'itino pe fa'asoesa ae le pa'itino i le nofoi ma totoga sa, fa'apea gaoigaga e le fepa'ia'i ai e pei o le fa'aaogaina o ata o totoga sa po'o feusua'iga. Matou te fa'alauteleina lea fa'auigaina i le Mata'upu 2.

Mai le 171 o tama tuai lea na tu'uina mai fa'amatalaga i le Su'esu'ega Fa'apitoa e uiga i sauaga tau feusua'iga fai fa'amalosi, e <sup>3</sup>,126 na lipotia le sauaga tau feusua'iga fai fa'amalosi o i latou i le A'oga a Dilworth. I le mae'a ai ona iloilo o fa'amatalaga ma fa'atalanoaga au'iliiili, ma toe iloilo fa'alaua'itele pepa o fa'amatalaga, ua fa'amalieina ai matou i molimau lea na matou fa'amoemoe iai e fa'apea e moni ma fa'amaoni nei molimau.

E fa'aopoopo atu i le 126 tamaiti a'oga, e silafia e le Su'esu'ega Fa'apitoa nisi tama tuai e to'a 49 lea na a'afia i sauaga tau feusua'iga fai fa'amalosi i le A'oga a Dilworth ma ua o'o atu ai le aofa'i i le 175.<sup>4</sup> E talitonu le Su'esu'ega Fa'apitoa o le numera o tamaiti a'oga na sauaina e ono maualuga atu.<sup>5</sup> Matou te mata'ina le numera fa'atatau a leoleo e 233 tamaiti a'oga na sauaina.<sup>6</sup> Ua matou maua, o sauaga tau feusua'iga fai fa'amalosi na fa'atino ma fa'aauuina i le A'oga a Dilworth mai le 1950 e o'o atu i le tausaga e 2005. Sa fa'ateteleina i le va o le 1970 ma le 1990. E to'alua ni faia'oga na lipotia i le mae'a ai o le tausaga e 2005, tasi i le 2011 ma le isi i le 2018. Matou te le'i toe fa'alogoina nisi sauaga tau feusua'iga fai fa'amalosi e a'afia ai le afaigaluega talu mai lea vaitau, peita'i, matou te le o mautinoa ma le mausali pe na toe tula'i mai ona o le fa'atuai o le lipotia o sauaga tau feusua'iga fai fa'amalosi.

3 E le'i talanoa tamaiti a'oga uma i aafiaga itu uma na feagai ma latou i le A'oga a Dilworth. O nisi tamaiti a'oga na latou tu'uina atu na o ni fa'amatalaga o sauaga fa'ao'olima tuga ma nisi itu a o latou iai i le A'oga a Dilworth, e ui na iloa e le Su'esu'ega Fa'apitoa i ana su'esu'ega na iai nisi sauaga sa ono tula'i mai.

4 O lenei numera na aofia ai ma tamaiti a'oga ua maliliu, peita'i o fa'amatalaga na tu'uina mai e sui o aiga; i latou lea na iai ni molimau mauaututu na fa'amauiina e uiga i sauaga po'o fa'amatalaga na fa'amauiina i pepa o fa'amatalaga a le A'oga a Dilworth, peita'i, o le tagata na fa'asaoina mai i sauaga e le'i lesitala i le Su'esu'ega Fa'apitoa. O le aofa'iga o tamaiti a'oga o lo'o silafia e le Su'esu'ega Fa'apitoa na a'afia i sauaga tau feusua'iga fai fa'amalosi i nei vaitau ese'ese e aofia ai Conolly e 4; Parr e 69; Wilton e 89, ma MacLean e 31. O nisi o i latou ta'ito'atasi na sauaina e silia ma le to'atasi le tagata na fa'atinoina ia sauaga ma e le na o se vaitaimi se tasi na fa'atinoina ai.

5 Na fa'apea le Su'esu'ega Fa'apitoa o tama tuai matutua o le a'oga na sauaina e la'itiiti se numera pe a fua i o latou tausaga ma le soifua maloloina, e fa'apea o nisi o nei tama tuai na sauaina ua maliliu, e fa'apea e fa'afaigata i o latou lagona ma manatu ona latou fa'aalia nei mea, ma o isi na aga'i sa'o lava i le polokalame o le Ola Toe Fa'aleleia e aunoa ma se fa'amatalaga tu'uina mai i le Su'esu'ega Fa'apitoa, ona e latou te agava'a ai.

6 O fa'amaumauga na tu'uina atu i le Su'esu'ega Fa'apitoa na faia e Leoleo ia Ianuari 2023. O lo'o silafia fo'i e le Su'esu'ega Fa'apitoa ni tagata se to'atolu na sauaina e ni tagata matutua e iai so'otaga ma le A'oga a Dilworth.

Na molia e leoleo ni tagata e 12 sa faigaluega i le A'oga a Dilworth fa'apea ai ma se tagata sa galue le totogia i ni moliaga se tele i sauaga tau feusua'iga fai fa'amalosi na a'afia ai se 65 o tama tuai.<sup>7</sup> O le moliaga muamua na faia i le 1994 ma le moliaga lata mai na faia lea i le 2022. I lona aofa'iga, e 11 tagata sa faigaluega i le A'oga a Dilworth na fa'asalaina i soligatulafono tau sauaga fa'afeusua'iga fai fa'amalosi na a'afia ai tamaiti a'oga e to'a 50.<sup>8</sup> Ua fa'amalieina le Su'esu'ega Fa'apitoa e fa'apea o le faitau aofa'i o sauaga tau feusua'iga fai fa'amalosi o tamaiti a'oga e i latou sa galulue i le a'oga e sili atu na i lo moliaga ma fa'asalaga na faia e leoleo. O se fa'ata'ita'iga, o Peter Taylor sa fa'asalaina ona o le a'afia ai o ni tama tuai se to'alua, peita'i, o lo'o iloa e le Su'esu'ega Fa'apitoa ni tama a'oga e to'a 35 na ia sauaina.

O le tele o tamaiti a'oga na sauaina e sili atu i le fa'atasi ona fai. E ui ina tele faitioga e fa'atatau i sauaga tau feusua'iga na faia e se tagata sa galue muamua i le a'oga, peita'i, e 42 tamaiti a'oga na lipotia o latou sauaga tau feusua'iga fai fa'amalosi e isi tamaiti po'o ni auvaega o tamaiti a'oga.

O le lautele o sauaga tau feusua'iga fai fa'amalosi na silafia e le Su'esu'ega Fa'apitoa ma tula'i mai i le piliota o lo'o iloiloaina e maua i le mata'upu 3 e o'o i le 6, ma le fa'asologa o taimi i le appendix 5.

## Natura o sauaga tau feusua'iga fai fa'amalosi

E tele itu'aiga sauaga tau feusua'iga fai fa'amalosi na lipotia, e mai le lafoina o ata o totoga sa ma gaiioiga mataga e o'o i feusua'iga fai fa'amalosi. O tamaiti a'oga sa fa'atalanoaina e se tagata matua ma i'u ai ina faia ni feusua'iga fai fa'amalosi ma sauaina e faia'oga a le A'oga a Dilworth, pule o fale nofotumau, faife'au, faia'oga, tagata sa galuelue le totogia, uo ma pa'aga a tagata faigaluega. O gaiioiga o le fa'atalanoaina e se tagata matua ma i'u ai ina faia ni feusua'iga fai fa'amalosi ma sauaga na tula'i mai i le taimi o lesona fa'alelotu, fesoasoani mai le a'oga, a'oga pese, taimi paganoa i fale o le nofo tumau, taimi o lesona i potu a'oga, ma isi gaiioiga e aofia ai tolauapiga, malaga a le a'oga, tolauapiga i fafo atu o le a'oga ma mea e fiafia iai tamaiti a'oga.<sup>9</sup> O le fa'atalanoaina e se tagata matua ma i'u ai ina faia ni feusua'iga fai fa'amalosi ma sauaga sa fa'atinoina e fua i tausaga, matua o le mafaufau ma tulaga o vaivaiga o tamaiti a'oga sa lesitala i le a'oga, ma o le to'atele sa mo'omo'o i se tagata e fa'apei o se tama. I le tele o taimi, na fa'atino loa gaiioiga o le fa'atalanoaina e se tagata matua ma i'u ai ina faia ni feusua'iga fai fa'amalosi, o le tamaitiiti na fa'atutu iai lea gaiioiga na sauaina mulimuli ane pe na tau-sauaina o ia. O le fa'atalanoaina e se tagata matua ma i'u ai ina faia ni feusua'iga fai fa'amalosi na a'oa'oina ai nisi tama a'oga a matutua ona latou fa'aaogaina lea o ia metotia e sauaina ai tamaiti laiti. O le tele o tamaiti na fa'atalanoaina e se tagata matua ma i'u ai ina faia ni feusua'iga fai fa'amalosi ma sauaina sa i le va o le 8 ma le 14 tausaga le matutua.

7 O lenei numera e aofia ai moliaga ma tagata na fa'asaina mai i sauaga ae le'i fa'atinoina le Operation Beverly. O nei fa'amaumauga e aga'i tonu i moliaga i le piliota o lo'o iloiloaina, 1950 e o'o i le 2023.

8 O Mr Leonard Cave, Mr Ian Wilson, Mr Ross Browne, Mr Alister Harlow, Mr Graeme Lindsay, Mr Keith Dixon, Mr Howard Wynyard, Mr Johnathan Stephens, tagata faigaluega o RZ, tagata faigaluega o TS ma Mr Peter Taylor. O moliaga o Mr Dixon e fa'asaga i solitulafono na tula'i mai i le tausaga e 2014. E to'alua laua na maliliu ae le'i fa'amautuina o la moliaga.

9 O tolauapiga o le GLL na faia e Mr Browne ma fa'atautaia e tagata faigaluega sinia o le a'oga. O tamaiti a'oga na iloa e le a'oga e vaivai na auai i nei tolauapiga i Huiia, i Aukilani i Sisifo, na fa'atino ai gaiioiga i ni kulupu ma fautuaina ai ma fa'amalosia e fa'ailoa atu ni o latou fa'afitauli, e aofia ai ma sauaga tau feusua'iga fai fa'amalosi. O gaiioiga na faia i le tolauapiga e aofia ai le fefusi'ai ma fofo fai fa'atasi ma ta'ito'atasi. Na tu'u lava i le loto faitalia o tamaiti a'oga pe ono avea le fa'asoa ane o nei sauaga e faia ai ni faitioga e lipotia i le a'oga po'o leoleo. O nei tolauapiga na avea ma nofoaga e fa'afaiilele ai tamaiti a'oga, na matele ina sauaina mulimuli ane ai, ma sa lepetia le fa'alilolilo i nisi o taimi i le toe fo'i atu i le a'oga ina ua fa'alumaluma ma fa'apalopalo iai nisi i le a'oga ona o ni sauaga na latou fa'ailoa.

## A'afiaga o sauaga tau feusua'iga fai fa'amalosi i tama tuai

O a'afiaga o sauaga na vave ma fa'aauau pea. Na tele ina fa'afuase'ia ona pa'u tulaga lelei o taumafaiga fa'alea'oa'oga; o nisi o tama sauaina ua amata ona le manino le tautala, ua popolevale, susu le moega, ma ua le lelei se moe; na fa'anofoesea ma fa'anoanoa ma tumu i le fefefe i iloa o latou sauaga e isi tamaiti ona ulagia lea o latou. O nisi ua amata ona ulaula tapa'a ma mariuana, ua so'ona fa'aaoga vaega e pei o kelu ma le inu ava fa'asaina e tau fa'agalo ai o latou tiga, ma fa'avaisuina ai i latou i ia amioga mai le 11 o o latou tausaga aga'i luga. O nisi na fa'avaisuina le matamata i ata fa'afeusua'iga ona o le maoa'e o le fa'asoa le 'ano'ano a e na sauaina i latou. Mo le to'atele, na vave ona suia a latou amio i ni tulaga le lelei, ae o isi, ina ua leai o nisi e talitonuina a latou faitioga ma fa'aauau ai pea lo latou sauaina, na mafua ai ona latou fa'aalia ni amioga fa'atu'iese ia "tutuli" ai latou ma le a'oga.

O sauaga sa mata'utia ona o'oo'oga. I le tu'ua ai o le a'oga, o le to'atele o tamaiti a'oga na sauaina sa maualalo la latou taumafai pe a fa'atusa i o latou agava'a. Mai ia i latou na ausia a'oga maualuluga po'o a'oa'oga, o le to'atele e le'i mae'a a latou taumafaiga. O le to'atele sa galulue i galuega e maualalo atu i o latou agava'a, ma masani ona sui mai lea galuega i lea galuega e le mo'omia ai ni tomai fa'apitoa. O isi e umi se taimi sa le mafai ai ona galulue ona o le tele o le a'afiaga o le mafaufau. O isi sa fa'asalaina i soligatulafono, e mafua mai i le le maua o ni galuega. O nisi sa loka i falepuipui, a o isi sa leai ni fale e aumai ai i ni taimi umi. O le to'atele o lo'o mafatia i le le mafai ona maua o ni totogi lelei.

O le to'atele, aemaise i latou na umi se taimi na fa'atalanoaina e se tagata matua ina ia faia ni feusua'iga fai fa'amalosi, ua le mautonu i o latou lagona fa'asino itupa. O i latou na sauaina ma fautuaina e tagata sa faigaluega i le ao'ga e faia ni faiga fa'aleulugali'i ma isi tama a'oga na latou lagona le ma ma le maasiasi. O le to'atele na feagai ma vaisu o le olaga i le ta'i luasefulu ma le ta'i tolu sefulu o o latou tausaga. O isi o lo'o feagai pea ma nei vaisu o le olaga. E to'atele na a'afia i gasegase o le mafaufau. O isi ua le toe iai se feso'ota'iga ma o latou aiga, o a latou uo ma tagata lautele sa masani ai. O le to'atele sa lipotia mai le feagai ai ma fa'afitauli tuga o le fa'atuatua o se tagata po'o feso'otaiga mafana ma isi. O nisi ua le mafai ona toe fai uo, ma le to'atele ua le mafai ona fa'aauauina ni faiga pa'aga mafana e pei ona masani a'i. O le to'atele ua le mafai ona tausia lelei a latou fanau. O nisi ua fa'aletonu a latou mafutaga ma o latou tina, o e ua o latou tu'ua'ia i le auina atu o i latou i le A'oga a Dilworth. O le leai o se fa'atuatua ua a'afia ai faiga uo ma le va fealoa'i ma isi tagata faigaluega. O le tele o tama tuai, ua saisaitia i se li'o o a'afiaga o fa'afitauli ma mea faigata ua lavelave fa'atasi ma ua tele ona le mafai ona 'alo 'ese mai ai.

O le to'atele o ali'i na feiloa'i ma le Su'esu'ega Fa'apitoa ona sa sauaina ua iai nei i vaega ese'ese o le toe fuata'ina o o latou olaga na leaga ma malepelepe i piliota ese'ese o lo latou olaga fa'atagata matua. Na matou fa'amauiina ma le loto fuatia ifo, lo latou loto toa ma lo latou naunauta'iga ina ia ola i ni olaga lelei. Matou te amana'ia fo'i tina, aiga ma tausoga o i latou ua maliliu ma e le'i mafai ona matou lagona so latou leo tu'usa'o mai.

## Sauaga fa'ao'olima tuga

Lautele o sauaga fa'ao'olima tuga

Ua fa'amatalaina e le Su'esu'ega Fa'apitoa le 'sauaga fa'ao'olima tuga' o ni gaoiga e mafua ai ni manu'aga o le tino po'o le mafaufau, e pei o le tuga fa'a'umi'umi, fa'anoanoaga, tuga, fa'ate'ia po'o le le to'amalie. O lipoti o nisi o sauaga fa'ao'olima tuga na lipotia i le Su'esu'ega Fa'apitoa e maua i le mata'upu 3 e o'o i le 6.

Mai le 159 o tama tuai na tu'uina mai fa'amatalaga i le Su'esu'ega Fa'apitoa e uiga i sauaga fa'ao'olima tuga i le A'oga a Dilworth, e<sup>10</sup>,<sup>134</sup> na lipotia mai le a'afia i sauaga fa'ao'olima tuga a o iai i le a'oga. E lua ni vaega lautele o nei sauaga na lipotia mai. Muamua, o le fa'apalopalo, na fa'atinoina e le to'atele o tama a'oga matutua, tino tetele toe malolosi. O le isi sauaga e aofia ai sauaga fa'ao'olima i tamaiti a'oga na fa'atinoina e faiaoga ma ta'ita'i o fale nofo tumau, ma faia'oga i totonu o le a'oga. O le tele o taimi i le vaega mulimuli na tula'i mai i le fa'aaogaina o le sasa ma na sili atu na i lo ta'iala o le sasa fa'atonu i lena vai tau.

### Fa'apalopalo

I le tala'aga o le aiaiga o galuega fa'atino, o le fa'apalopalo e iai lona elemeni fa'aletino.<sup>11</sup>

O le fa'apalopalo fa'ao'olima e feso'ota'i ma gaoiga e pei o le tulei, tu'i, kiki, fasiga o se tamaitiiti a'oga, tuleiga malosi o se tamaitiiti a'oga aga'i i se mea fai tino, tulei aga'i i puipui po'o lalo o se fasitepu, po'o le fa'amalosia o se tamaitiiti e fai ni gaoiga e tuga ma fa'alumaluma. E feololo lipoti na ta'ua ai manu'aga tuga e aofia ai le tofolia ma manu'a, gau'i ponaivi ma ta'ei nifo e mafua mai i le fa'apalopalo. E to'atele nisi sa mo'omia ai le togafitia i le a'oga po'o le falema'i i manu'a na a'afia ai ae o isi manu'a o lo'o fa'aaauu pea ona a'afia ai tama tuai o le a'oga. O faiga fa'apalopalo i se taimaitiiti a'oga na mafai ona fa'aaauuina mo nai masina po'o ni tausaga fo'i.

Ua matou fa'ai'uina e fa'apea o le fa'apalopalo, aemaise lava i ona tulaga fa'aaauuina, sa iai lona a'afiaga tele i le tamaitiiti a'oga. I totonu o le a'oga, na mafua ai ona lagona le fefe ma lagona ai le musu e toe fia mafuta i se tagata, suia amio ma uiga va'aia, ma fa'aitiiti ai le ausia o vaega e tatau ona ausia i le a'oga fa'apea le auai i gaoiga e aofia ai le a'oga i taimi paganoa. Na lipotia mai e tama tuai lo latou faia o ni gaoiga na toe mafatia ai i latou lava ma na iai fo'i o latou mafaufauga o le fia pule i le ola na mafua mai i ni fa'apalopologa matuia. O nisi na taumafai e pule i le ola ae o nisi na maliliu lava i le pule i le ola. Sa lipotia mai foi, o vaivaiga o le soifua maloloina i taimi ina ua avea ma tagata matutua, na afua mai i o latou a'afiaga i sauaga ma mafatiaga a o a'o'oga. I le avea ai ma tagata matutua, na feagai pea i latou ma lagona le mautonu ma a'afiaga o le mafaufau ma ua a'afia ai ma lo latou agava'a i o latou tomai i a'oga, galuega ma osiga mafutaga.

10 E le o tamaiti uma na latou fa'ailoa mea uma na latou feagai ai i le A'oga a Dilworth. O nisi tamaiti na o fa'amatalaga e uiga i sauaga tau feusua'iga fai fa'amalosi na latou fa'aalia.

11 Na fa'aaogaina e le Su'esu'ega Fa'apitoa le fa'auigaina e le Matagaluega o A'oga o le fa'apalopalo, e mo'omia ai le iai o se fa'amoemoe e fa'amanu'alia se tagata; le fa'aaogaina sese o le malosi e fua i le tele o le tino, tausaga, fa'asinomaga, va'aiga a tagata, agava'a po'o le mafai ona fa'aaogaina o mea tau tekonoosi; ma amioga fai so'o, e a'afia ai le tagata o lo'o faia iai nei amioga ma e le o tulaga masani o le ola tuputupu'e.

Mo le to'atele o i latou na molimauina uiga fa'apalopalo, na mafua ai ona maua i le fefe, le fia tautala, ma maua ai lagona o le fia mou ese atu ma nei tagata fa'apalopalo. Mo le au fa'apalopalo, na latou fa'alogoia ni lagona le manuia e pei o le fia malosia ma le fia pule. Mo nisi, o i na mafua ai ona latou maua lagona o le loto tete'e ina ua matutua, e afua mai lea i lo latou toe faia o nei uiga fa'apalopalo i tamaiti laiti. Na fa'aitiitia ai lagona alofa, ma ina ua avea ma tagata matutua, o le tele o le au fa'apalopalo na latou lagonaina le ta'usalaina ma le maasiasi.

E to'atele tamaiti a'oga na latou lipotia le le mafai ona 'alofia le faifai tau fa'aleaga, fa'atiga ma le fa'atauemu, na tula'i mai i le taimi o a'oga ma fa'aaauai lava i fale o le nofo tumau. O le fa'apalopalo na avea ma se tasi o fa'afitauli tele i le a'oga e o'o mai lava i lena seneturi. I le tele o tausaga o tele o mafua'aga o nei fa'afitauli e aofia ai le lava o le aufaigaluega i fale o le nofo tumau ma le fa'amoemoe i tama a'o'oga matutua e fa'afilemuina le a'oga.

### O le sasa o se tasi o vaega o sauaga fa'ao'olima tuga

Na matou iloiloia le fa'aaogaina o le sasa e faia'oga e soli fa'avae,<sup>12</sup>. O ta'iala o le Fono Fa'avae a le A'oga<sup>13</sup> ma ta'iala a le a'oga na iai i lena vaitau, i le fuafuaina e fa'apea o le sasa e pa'u i fafo atu o le 'sasa a'oa'i'.

Na fa'aaogaina e le a'oga le sasa o se auala muamua e pulea ma a'oa'i ai tamaiti a'oga, e aofia ai ma ni sese laiti. O le to'atele o le aufaigaluega i fale nofo tumau sa latou so'ona fa'aaogaina le sasa na mafua ai ni manu'aga tuga o le tino ma le mafaufau se'ia o'o atu ina fa'aitiitia i le 1980 ma lona fa'asaina i le 1990. E le'i amana'ia ta'iala o le sasa ma, se'ia vagana ai nisi taimi, o pule o fale nofo tumau ma nisi o faia'oga o ni tagata ta'uileaga ona o le fa'aaoga seseina o le sasa, e le'i faia iai ni fa'ai'uga i a latou gaioga.

O le tele o tamaiti a'oga na lipotia mai le sasaina i mafua'aga le tatau e pei o le totoe o mea fulunifo i pulumu fulunifo ma o le matuia o le sasa na iloa atu ai a'ano i o latou vae, lima, fatafata ma nofoi ma mafua ai ona fufula ma patupatu o latou tino<sup>14</sup> i nai aso po'o vaiaso. O le to'atele na lipoti maia le sasaina i ni sasa na fa'amanu'alia ai o latou ulu ma lima, ma sa latou iloa o nisi o le aufaigaluega sa maua ai ni lagona e fa'amalie ai o latou mana'oga tau feusua'iga i le sasaina o le pa'u o le tino. O nisi na sasaina ona o lo latou fa'ailoa atu o ni sauaga tau feusua'iga fai fa'amalosia na faia e se faia'oga.

O tamaiti a'oga laiti sa fa'amata'uina i le lamatia o i latou i le sasa so'o. O le sasa na sauaina ai tamaiti a'oga, na a'oa'o ai i latou e fa'aaoga sauaga o le fa'ao'olima tuga, ma atili ai ona fa'apala'aiina latou e tali atu i le fa'apalopalo ma sauaga tau feusua'iga fai fa'amalosia.

12 O le Vaega 68 o Criminal Code Act 1893 o lo'o ta'ua ai e fa'apea o se matua, po'o se tagata i se tulaga o se matua, e aofia ai se pule a'oga, e mafai ona ia fa'aaogaina se malosia'aga i se auala e fa'asa'o ai se tamaiti po'o tamaiti a'oga i lana va'ava'aiga, e fa'apea o lea malosia'aga e talafeagai i ia tulaga. O le Vaega 59 o le Crimes Act 1961 o lo'o fa'aaauua ai lea malosia'aga.

13 O lo'o ta'ua i le lipoti tulafono fa'atonutonu na tu'uina mai e le Fono Fa'atonu Fa'aitumalo a Aukilani ona o iina le si'osi'omaga fa'afanua talafeagai.

14 E aofia ai ni mea na tutupu e pei o le tu'uina o ulu o tamaiti a'oga i le va o pa vevela mo solo ta'ele ona tu'u lea o o latou lima i paipa vevela a o sasaina, ina ia fetoi ai o latou ulu ma le mea e tautau ai solo pe a migoi i le sasa ma tu'u o latou lima vevela i o latou ulu.



## O vaega na fesoasoani i sauaga

O le auai o le aufaigaluega na latou faia sauaga tau feusua'iga fai fa'amalosi i tamaiti a'oga i le A'oga a Dilworth, lamatia o tamaiti a'oga, leai o se malosia'ga o matua, le mata'utia ma le ogaoga o le si'osi'omaga o le a'oga ma ana tu ma aga masani, o le fa'atamala o le ta'ita'iga o le A'oga ma le pulea o le Fono Fa'atonu, na afua ai le fa'amausaliina o tulaga ma'oti o nei sauaga ma fa'aauau ai pea.

## Le aufaigalega sa avea ma tagata fa'asaua

O le aufaigaluega sa latou faia sauaga tau feusua'iga fai fa'amalosi i tamaiti a'oga e lua ni vaega na aofia ai. O le vaega muamua o faia'oga, e matele i ali'i talavou, lea sa latou va'aia tamaiti a'oga i fale o le nofo tumau i le tu'ua ai o a'oga fa'apea ma afiafi. O nei faia'oga sa tele i le au su'esu'e ai ma latou sauaina se tasi pe to'alua fo'i o tamaiti. O le vaega lona lua e aofia ai faia'oga ua loa tausaga o tautua ma ua fa'atuatua i tulaga sinia, sa masani ona galulue fo'i i fale o le nofo tumau. E tofua latou ma sauaga na fai i le tele o tamaiti a'oga.

E feololo le aufaigaluega i le vaitau o Parr sa latou sauaina tamaiti a'oga na latou iloa le sauaina e isi faia'oga o tamaiti a'oga ma sa latou galulue fa'atasi i nisi o taimi e fa'atino ia sauaga. E feololo tamaiti a'oga na sauaina i le mae'a ai ona fa'ailoa atu e se faia'oga e iai ni mana'oga tau feusua'iga i tamaiti o totonu o le scouts i sana uo e iai fo'i ni ona mana'oga tau feusua'iga i tamaiti. I lona fale, na tu'u ane ai i tamaiti a'oga fualau fa'asaina, ava malosia ma ata o totoga sa ma feusua'iga, ma sa tele ina faia ai ni sauaga tau feusua'iga fai fa'amalosi.

## A'afia gofie o tamaiti a'oga o le A'oga a Dilworth ma le leai o se malosia'ga o matua

Ona o tamaiti a'oga e omai i aiga e "faigata tulaga o iai"<sup>15</sup>, ma e matele ona omai i aiga na iai ni manu'aga ma fa'afitauli ma ua leai ni tama, na mafua ai ona faigofie ona sauaina i latou e faia'oga tama. Na mamao se faiga pa'aga a le a'oga ma matua i le piliota o lo'o iloiloaina ma e le'i iai so latou sui i le Fono Fa'atonu. Sa seasea lava ona fa'ailoa iai se faiga fa'apalopalo, tulaga tau soifua maloloina, faitioga o sauaga tau feusua'iga fai fa'amalosi po'o sauaga fa'ao'olima tuga na faia i a latou fanau tama, e aofia ai ma le taimi na iloa ai e le a'oga o lo'o sauaina fanau a nei matua. O le tulaga puipui a matua i a latou fanau na maitauina le toe toe a a misi atoa i le piliota o lo'o iloiloaina.

## Si'osi'omaga o le A'oga

O se su'esu'ega lata mai i Ausetalia ua fa'amaonia ai o a'oga nofo tumau a tama e fai si maualuga o le ono a'afia ai o tamaiti a'oga i o latou si'osi'omaga.<sup>16</sup>

15 Vaega e te agava'a ai i le mavaega a James Dilworth mo le lesitalaina o tamaiti a'oga

16 O P Parkinson ma J Cashmore, Iloiloga o Aofa'iga ma Tulaga Vaaia o Sauaga tau Feusuaiga i totonu o Fa'alapotopotoga, Komisi Su'esu'e Faapitoa mo Tali mai Fa'alapotopotoga i Faitioga tau Feusuaiga Fai Fa'amalosi i Tamaiti, le Commonwealth i Ausetalia, 2017, itulau 25. O le iloiloiga a Parkinson ma Cashmore na fa'atinoina i se talosaga mai le komisi su'esu'e a Ausetalia e fa'amautinoa ai se auala e fa'ailoa ai le ese'esega o itu'aiga a'oga e fa'avasegaina i le ese'esega o a'afiaga o sauaga tau feusua'iga fai fa'amalosi i tamaiti.

Ae le'i aulia le vaitau o le 1990, na iloa ai i le nofo tumau a le A'oga a Dilworth lea itu'aiga si'osi'omaga ma sa fa'amatalaina o se nofoaga e matuia ma leai se kea e aofia ai sauaga o le fa'ao'olima tuga ma le fa'apalopalo. O se nofoaga e iai le pule fa'avasega amata mai i e maualuga, e malosi ana tulafono ma e matua fa'amalosia. O nisi tagata faigaluega sa fa'ailoa o latou igoa sa latou fesoasoani i tamaiti a'oga ma avea ma auala e maua ai se si'osi'omaga e lagolagoina tamaiti. Sa la'itiiti so latou sao i tu ma aga a le a'oga na i lo latou sa fa'aaauaina ia uiga leaga.

E le'i lava le aofa'i o faia'oga i fale o le nofo tumau i le tu'ua ai o le a'oga fa'apea ma le afiafi. Se'i vagana ai nisi o taimi, o le aufaigaluega i fale o le nofo tumau sa latou onosa'ia le maualuga o le tulaga o le fa'apalopalo ma le fa'ao'olima e o'o mai i le ogatotonu o le vaitau o le 1980. O tamaiti a'oga sinia e le'i faia ni toleniga fa'a faia'oga, lea na sauaina fo'i, ua tu'u iai matafaii o pei o faia'oga. Ae le'i aulia le tausaga e 2018, i lalo o ta'iala a le a'oga, na mafai e tamaiti a'oga sinia ona fa'aaoga le malosi'aga tau pulega fa'atagata matua e fai ai fa'asalaga o tamaiti laiti. O le faiga fa'ao'olima e tamaiti a'oga matutua o tamaiti laiti na fa'atupu ai le fefe ae le o ni fa'ata'ita'iga o ni ta'ita'i lelei. Na iloa ai e tamaiti laiti, a latou matutua, e mafai fo'i ona latou fa'asala ma fa'amata'u i tamaiti a'oga i auala e a'afia ai o latou tino ma mafaufau.

Sa iai se aga masani o le fa'asea pe inoino i tama fa'afafine, fa'apea ma aga fia fai maso pe fa'aaliali malosi, na mafua ai ona tupu le fefe i tamaiti a'oga e fa'apea o le a fa'aese i latou, pei o ni aga a ni teine pe fa'afafine fo'i. Se'ia aulia le i'uga o le vaitau o tausaga i le 1990, o ia manatu e leai ni pa puipui na mafua ai ona fa'aaauu pea le fa'atauemu ma le fa'apalopalo ma le le puipuia o tamaiti a'oga i sauaga tau feusua'iga fai fa'amalosi na fai e isi tamaiti ma le aufaigaluega.

O i latou na fa'apei e vaivai atu i isi pe ese mai i lo isi na avea ma e na patino iai le filifiliga. I le tele o tausaga, sa iai ma se tu ma aga o le fa'ailoga lanu na avea ai tamaiti Maoli ma tamaiti a'oga mai isi atunu'u e ese mai i Europa sa ta'u fa'atauva'aina ma sa masani ona avea ma tamaiti e fai iai uiga fa'apalopalo.

Sa iai se faiga mautu, sa matua fa'amalosia ai le "sa ona faitala i leoleo po'o pulega". So'o se tamaiti a'oga e faitio e tele ina le talitonuina ma na fa'asalaina, ma avea ma pa pupuni i faitioga. Na talitonuina atu faia'oga na i lo tamaiti a'oga, ma sa lagonaina ai e tamaiti le leai o se latou malosi'aga. O feso'ota'iga a tamaiti a'oga ma o latou aiga sa ono mata'ituina ma sa iai ni piliota na le mafai ai ona o i o latou aiga, ma vavamamao ai i latou mai se fesoasoani mai i o latou aiga.

Ae le'i aulia le fa'aiuga o le vaitau o le 1990, sa leai ni a'oa'oga na faia mo tamaiti a'oga e uiga i le saogaelmu fa'aletino ma latou lava ia, ma o le leai o se fesoasoani talafeagai mai le a'oga na mafua ai ona a'afia tamaiti i a'afiaga o le mafaufau. O nei tulaga na mafua ai ona fa'aitiitia le talitonu ma le manatu maualuga o tamaiti a'oga ia i latou lava ma avea ai ma mafua'aga na faigofie ai ona sauaina ma faigata ai ona tete'e atu i sauaga pe faitio fo'i i nei sauaga.

Na fa'ailoa so'o e Mr Parr, Dr Wilton ma Mr MacLean i le Fono Fa'atonu e fa'apea, i fa'afitauli e ono a'afia ai tamaiti a'oga ona o le utiuti o le aufa'afaigaluega o lo'o va'aia fale o le nofo tumau, ma o le fa'afaigaluegaina o faia'oga fa'aopoopo e ono fa'aitiitia ai le tula'i mai o ni fa'afitauli. Peita'i, na fa'atagaina pea le fa'aaauu o lea tulaga ma e le'i fa'atalanoaina i le vaitaimi o Parr, na o sina suiga la'ititi i le vaitaimi o Wilton, peita'i, fa'ato'a toe taga'i iai le Fono Fa'atonu o se mata'upu tuga i le vaitaimi o MacLean.

## Fa'aletonu i le ta'ita'iga ma le pulea o le a'oga

### Fa'atalale e tali atu i faitioga ma popolega

E to'atele tamaiti a'oga e le'i faitio i sauaga tau feusua'iga fai fa'amalosi. O mafua'aga e aofia ai le ma ma le le mautonu, taufa'amata'u ia aua le pisa, fa'asalaga, le tu ma aga o le aua le faitala i leoleo ma pulega, leai se auala mautinoa mo faitioga, ma le fa'avaivaia o se malosi'aga, fa'apea le fa'aletonu o le si'osi'omaga o le a'oga. O mafua'aga fa'apenei na mafua ai le to'alaiti o tamaiti a'oga na fai ni a latou faitioga i sauaga fa'ao'olima tuga.

Peita'i, i le tele o vaitau na faia ai ni faitioga o sauaga, i tausima'i i le a'oga, tamaiti a'oga matutua, pule o fale nofo tumau, faife'au, faia'oga, ta'ita'i sinia ma pule a'oga. Na matele ina faia ia faitioga e le tamaiti a'oga na sauaina, tamaiti a'oga na molimauina ia sauaga, po'o tina o tamaiti. O le mata'upu 3 e o'o i le 6 e ta'u atu ai au'ililiga o tali na faia mai i faitioga uma. O le tele o faitioga na fa'ate'aina e aunoa ma se su'esu'ega ma e le'i lipotia i le Fono Fa'atonu.

O tamaiti a'oga i le viataimi o Connolly ma Parr sa masani ona fa'aigoa o tamaiti pepelo, fa'atupu fa'alavelave, sa'ili manogi ma sa tu'ua'ia i le ta'uleagaina o le faia'oga lea e faitioina. Sa masani ona fa'asalaina i fa'asalaga mamafa, e matele lava ina sasa. O lo'o iai ni molimau e itiiti ni iloiloga o amio pulea na fa'atinoina i nisi o taimi. E leai ni su'esu'ega sa faia e iloa ai le lautele o le fa'afitauli.

O le tele o faitioga i le vaitau o Wilton sa fa'ate'a pe fa'aitiitia, ma e le'i su'esu'eina. Na fa'ailoa i tamaiti a'oga o i latou lea e faia tala fa'atupu ma o tina lea na lipotia o latou popolega na fa'ailoa iai ua ova la latou faitau i nei mata'upu. O tamaiti na faitio e uiga i faife'au i le vaitaimi o MacLean na fa'ailoa iai o ia amioga o amioga masani, e o'o lava i lipoti o sauaga tau feusua'iga fai fa'amalosi ma isi tamaiti a'oga. O le tele o tala'ave, ma le fa'ailoaina o popolega po'o le fa'anoanoa e uiga i le faife'au i le vaitau o MacLean e le'i faia iai se i'uga ae sa fa'atali i se "faitioga maumaututu", ona o le malamalama'aga o MacLean e fa'apea o se fautuaga fa'aletulafono lea na maua e le Fono Fa'atonu.

### Fa'atalale e faia ni su'esu'ega

I va o le 1971 ma le 2006, na maua ai e le a'oga ni faitioga e uiga ia i latou nei sa galulue i le a'oga lea sa molia ma fa'asalaina: Leonard Cave, Jonathan Stephens, Keith Dixon, Rex McIntosh, Peter Taylor, Howard Wynyard, tagata faigaluega o RZ, Ian Wilson ma Ross Browne. Na maua fo'i faitioga e uiga i le tagata sa galue le totagia i le Scouts a Dilworth o Richard Galloway.

Afai na iai se faitioga na fa'ailoa i le Fono Fa'atonu, na fa'apea lea ona latou fa'auigaina le mata'upu o se ese'esega i tulaga tau galuega. O tagata faigaluega sa tu'ua'ia na tu'u iai le avanoa ma o latou talia le fa'amavae mai le galuega i lea lava taimi, ma o nisi o taimi sa maua ai ma penefiti tau seleni. E le'i logoina le fa'alapotopotoga a le a'oga ma tamaiti a'oga e uiga i le mafua'aga moni na fa'afuase'i ai ona fa'amavae lea tagata faigaluega. E ui ina iai se faitioga fa'amaonia e fa'asino ia Ian Wilson ma na iloa ua mae'a ona logo leoleo, se'ia o'o ina ia fa'amavae, e leai ni auala na faia i totonu o ni masina se tele e puipuia ai tamaiti a'oga na ia va'aia.

I le tula'i mai o se mata'upu e uiga i le amio a se tamaitiiti a'oga, na filifili le a'oga ia fa'aata o se mata'upu e uiga i le amio le pulea a lea tamaitiiti, ma fa'apea ai ona fa'avasegaina lea tamaitiiti e le fetau ia mo le A'oga a Dilworth ma fa'atulaga ai loa le alu ese o lea tamaitiiti ma le a'oga, a le o le ave'esea o lana sikolasipi, po'o le talosagaina o matua e ave'ese le la tama. Sa leai ni foliga va'aia na iai mo se amana'iaina o le tamaititi e le a'oga, e ui lava sa iloa e le a'oga o le tamaititi na a'afia i mafatiaga mai sauaga ma o lona a'afiaga e ono mafua ai ona suia le amio po'o le taumafai a lea tamaitiiti a'oga.

O le fa'atamala o le a'oga e mata'itu le suiga o uiga o tamaiti a'oga e mafua mai i se sauaga tau feusua'iga fai fa'amalosi, na le mafai ai e le a'oga ona fa'atalanoa lea mata'upu. O le ave'esea o tamaiti a'oga, na mafua ai ona fa'afilemu leo o isi tamaiti a'oga ma puipuia ai le tagata sau.

A tu'ua e tagata faigaluega le a'oga, o faitioga i sauaga fa'asolopito sa fa'aauau ona lipotia, peita'i, e leai ni su'esuega na faia iai pe na iai fo'i se fesoasoani na ofoina atu i tama tuai na a'afia ai.

### Fa'atamala e faia lipoti i leoleo po'o le matagaluega o a'oga

Ae le'i aulia le 1994, e le'i lipotia e le Fono Fa'atonu ni tagata faigaluega i leoleo, ma e leai ni lipoti e uiga i nei faia'oga le mo'omia na faia i le Matagaluega o A'oga, po'o lalo fo'i o le matafaioi o le loto faitalia o le 1996,<sup>17</sup> e ui ina silafia e le a'oga ma mafai ona latou maua lisi o faia'oga le mo'omia na u'umia e le Matagaluega.<sup>18</sup> Na amata ave'esea lesitala a faia'oga i le amataga o le seneturi 20 ona o sauaga tau feusua'iga fai fa'amalosi i tamaiti a'oga ma o sauaga tau feusua'iga fai fa'amalosi sa faia i se tamaitiiti e se tagata matua na avea o se solitulafono<sup>19</sup>. Ana lipotia nei faia'oga sau e nei pulega atonu e fa'aitiitia ai le loto ma'a'a o isi faia'oga, ona latou le fa'aauauina ai lea o nei sauaga e aunoa ma se fa'aiuga tatau e fai iai. Na tu'uina atu e Dr Wilton ni pepa o fa'amatalaga e ta'uleleia ma lagolago ai ni faia'oga se to'a fa na fa'amavae ona o ni faitioga ia'i latou e uiga i sauaga tau feusua'iga fai fa'amalosi. O nei pepa o fa'amatalaga na mafai ai e nisi o nei faia'oga ona toe galulue i nisi a'oga ma avea ma auala ua fa'amalosi au ai i nei faia'oga sau. O lea faiga na a'afia ai le saogalemu o isi tamaiti a'oga.

E ui ina fa'atalale le Fono Fa'atonu e lipotia nisi o lana afaigaluega, sa silafia foi e le Fono Fa'atonu le lipotia e Mr Parr o ni tamaiti a'oga i leoleo, ma lana apoapoa'iga i leoleo e fa'apea, o lona talitonuga o le mea tonu lea e tatau ona ia fai.

17 O le Teuteuga o le Tualafono o A'oga 1996 na folasia ai se aiaiga fou e fa'ataga ai le fa'a'ailoa i loto faitalia i le Fono Fa'atonu o le Lesitala o Faia'oga o so'o se itu o amioga po'o le fa'atinoga e so'o se tagata sa faigaluega muamua e ono talafeagai ma le fa'atinoina e le Fono Fa'atonu o Lesitala o ona tiute tau'ave.

18 Na fa'amaonia e le Fono Fa'atonu talosaga a Mr Parr ina ia fa'afeso'ota'i le Matagaluega o A'oga mo lana lisi o faia'oga e le tatau ona toe fa'afaigaluegaina, peita'i e le'i lipotia soligatulafono a lana afaigaluega, e ui ina iloa e le A'oga a Dilworth o lo'o galulue i isi a'oga.

19 Lisi o faia'oga na fa'aleaogaina a latou leisitala e le Matagaluega o A'oga 1880 - 1922 ma le lisi o igoa po'o faila o tagata ta'ito'atasi na soloia lesitala e le Matagaluega o A'oga i le 1951 - 1982.

Ina ua faia le fa'amasinoga o Mr Taylor i le 1994 ma le 2000, e 'uti'uti se fesoasoani na tu'uina atu i leoleo. E le'i fa'ailoaina i leoleo e fa'apea o sui o le Fono Fa'atonu ma tagata faigaluega, o e sa latou iloa le mafua'aga o lona alu ese, sa avanoa pea mo ni fa'atalanoaga ma o ni fa'amatalaga talafeagai sa mafai fo'i ona maua i fa'amaumauga fa'a-soifua maloloina. Na pau le vaega na taga'i iai le Fono Fa'atonu o le taofia lea o le fa'ailoa fa'alaua'itele o le igoa o le a'oga ma le igoa o lea tagata faigaluega.

## Fa'atalale e fa'atino ta'iala po'o faiga fa'avae e tali atu ai i faitioga tau sauaga

I le piliota o lo'o iloiloaina o le tali atu a le a'oga i faitioga e fa'asino i sauaga tau feusua'iga fai fa'amalosi e matua mamao lava ma le tulaga e tataua ona iai se lala tau a'oa'oga. Mai le amataga o le vaitau o Wilton sa mautinoa e le Fono Fa'atonu sauaga tau feusua'iga fai fa'amalosi i tamaiti a'oga ona o faitioga ma le fa'ate'aina o tagata faigaluega. Peita'i, o faitioga mai i matua po'o tamaiti a'oga sa masani ona le amana'ia pe sa fa'amisi e le auaigaluega a le a'oga ma sa leai fo'i se faiga fa'afoe e fa'atulagaina ai le fa'ailoaina o ni faitioga matuia i le Fono Fa'atonu.

I le 1984 ma le 1989, na tu'uina mai ai e le Matagaluega o A'oga ni ta'iala e fitoitonu i sauaga tau feusua'iga fai fa'amalosi i a'oga ma auala e lipotia ai ia sauaga. Na logo a'oga e lipoti ni sauaga i leoleo po'o le Auaunaga mo Fanau, Talavou ma Aiga ma ia tu'uina atu se fesoasoani talafeagai i fanau a'oga na sauaina. I le 1989, na fa'atonuina ai a'oga, e avea ma faiga fa'avae, ia iai ni ta'iala e soalaupule ai ni masaloga o ni sauaga tau feusua'iga fai fa'amalosi o tamaiti a'oga, fa'apea fo'i faiga fa'avae e uiga i amio pulea e tataua ona fa'atinoina e faia'oga. Ona o le a'oga a Dilworth e tuto'atasi, o le ala lea na le fa'amalosi ai lo latou mulimuli i ia ta'iala. Ae ui i lea, e iai lona tiute tau'ave e fa'amautinoa ai lona usita'ia o ta'iala mo le saogalemu o tamaiti a'oga e pei ona fa'atinoina i totonu o isi a'oga i Niu Sila.

I le 1994, i le mae'a ai ona fa'amaonia o le solitulafono a Taylor i lona sauaina o se tamaitiiti a'oga i le A'oga a Dilworth, na maua ai e le Fono Fa'atonu se fautuaga mai lana loia ina ia latou fa'aaogaina ni faiga fa'avae e tali atu ai ma fa'amauina ai faitioga i sauaga tau feusua'iga fai fa'amalosi ma e tataua fo'i ona taumafai e sa'ili pe le o iai nisi tamaiti na sauaina. Na sa'ilia fo'i e le a'oga ma latou maua ni fa'amatalaga mai le Asosi o Scouts e uiga i faiga fa'avae sa latou fa'agalue'ina e tali atu ai i sauaga. O nei fautuaga na iloiloaina ae le'i fa'atinoina e le Fono Fa'atonu.

O se tusi ta'iala mo tagata faigaluega a le A'oga a Dilworth na tu'u'afatasia i lea tausaga e le'i aofia ai ni ta'iala mo tagata faigaluega e uiga i sauaga tau feusua'iga fai fa'amalosi, faiga e soalaupule ai se mata'upu o masalomia, po'o se ta'iala mo se fesoasoani e tu'uina atu i tamaiti a'oga na sauaina.

I le va o le 1994 ma le 1996, na maua ai e le a'oga ni faitioga, pe na fa'ailoa iai ni faitioga mai fafo atu o le a'oga, i sauaga tau feusua'iga fai fa'amalosi na fa'atinoina e Mr Taylor, Mr McIntosh, tagata faigaluega o RZ, Mr Harlow ma Mr Wilson. Sa taga'i iai i se va'aiga manino, e o'o ane i le 1996, na silafia lelei e ta'ita'i sinia o le a'oga ma le Fono Fa'atonu e le na o ni mata'upu tu'ese o lo'o feagai ma i latou. Sa latou iloa le tele o sauaga tau feusua'iga fai fa'amalosi i le anoano o tamaiti a'oga (ma e ono to'atele atu) na sauaina e tagata faigaluega e o'o atu i le to'aono le aofa'i, o nisi e le'i leva ona tu'ua le a'oga.<sup>20</sup> E ui i lea, e leai se gaiogiga na faia e fa'aaoga ai ana fautuaga fa'aletulafono ma fa'atulaga ai ni faiga fa'avae mo faitioga.

Ana le o'o mai i le tausaga e 2000 e le tusia se faiga fa'avae muamua mo faitioga. Sa papa'u, ma e le'i manino mai pe sa fa'atino aloa'ia i lene vaiata. I le tausaga 2006, o le taimi muamua lea na fa'atino aloa'ia ai e le a'oga se ta'iala mo faitioga a tamaiti a'oga, na fa'atulagaina i se siata ma ua fa'auluina e fa'apea, "E fa'apefea ona fa'atino se faitioga". E le o se faiga fa'avae; peita'i ua na o se fa'asinoala mo la'asaga e mulimulita'i ai se tamaititi a'oga a o le'i faia se faitioga. E ao ona silafia o le siata na fuafuaina e soalaupule ai so'o se itu'aiga faitioga ma e le o fa'ailoa mai ai ni fa'amatalaga e uiga i la'asaga e uia e le a'oga e soalaupule ai se faitioga.

## Fa'atalale a le Fono Fa'atonu e malamalama i matafaioi tau pisinisi a le a'oga

O se tasi o fa'aletonu tele a le Fono Fa'atonu o lona fa'amamua lea o tulaga e maua ai le tupe ae fa'atuatua'ia lana matafaioi o le pulea lea o se a'oga tulaga muamua ma le lua. O sui o le Fono Fa'atonu e matele ina filifili i o latou tomai fa'apisinisi, ma faia ai ni fa'ai'uga e fa'amamua ai le ta'uleleia o le a'oga na i lo le saogalemu o tamaiti a'oga. Sa aunoa ma ni agava'a tau a'oa'oga ma isi tomai talafeagai na iai i le pulea o le a'oga, fa'apea fo'i ma se sao o matua. Na talanoa mai se tasi o pule a'oga o lo'o soifua pea, i le tele o sana taumafaiga ae le'i manuia, ina ia mata'itu le Fono Fa'atonu i le fa'afoeina o le a'oga ma le ola manuia o tamaiti a'oga, ma e to'atolu ni pule a'oga na taumafai i le fia tausaga ina ia fa'aleleia le numera o faia'oga e fua i tamaiti a'oga e si'itia ai le saogalemu o tamaiti a'oga.

Fa'aletonu o le Fono Fa'atonu e fa'amautinoa le va'aia lelei o taumafaiga a le a'oga i se va'aiga ma i fafo

Na fa'atamala le Fono Fa'atonu e malamalama i a'afiaga o tulaga fa'aletulafono a le a'oga, ona o se a'oga tuto'atasi, sa matele lava ina mama lona fa'atulafonoina. O le iloiloga o lo'o fa'aaogaina i le taimi nei e le Ofisa o Iloiloga o A'oga mo a'oga tuto'atasi e fa'ata'eta'e aluga ma e faia lava e le pulega o a'oga. O le to'atele o sui o iai i le taimi nei ma sui tuai o le Fono Fa'atonu latou te le'i silafia e le mafai ona latou fa'amoemoe i ia iloiloga e fa'amalie ai i latou e fa'apea o le a'oga o lo'o lelei lona fa'agalua'ina ma o lo'o saogalemu tamaiti a'oga.

20 O Mr Taylor, Mr McIntosh, Mr Cave, tagata faigaluega o RZ, Mr Harlow ma Mr Wilson. Na iloa e ta'ita'i o le a'oga mea e uiga ia Mr Wynyard. .

Na fa'atamala le Fono Fa'atonu e fa'atulaga ni faiga fa'avae e ese mai i ta'iala a le Matagaluega o A'oga ma mulimuli ane o su'esu'ega a le ERO ina ia mautinoa ai le fa'aaauaina o le va'ava'aia o le taumafaiga a le a'oga, e aofia ai ona ta'ita'i, se manu e ono fa'ailoa mai le tele o ni fa'aletonu i faiga fa'avae mo le saogalemu o tamaiti a'oga. O le iloiloga e seasea ona faia i fafo atu o le a'oga i le va o le 1950 ma le 2019 sa le talafeagai e iloa ai ni a'afiaga, ma sa fa'amoemoe le Fono Fa'atonu i lipoti a le pule a'oga, e ui ina leai sona tomai fa'apitoa i lea tulaga.

## Fa'atamala o le Fono Fa'atonu e fa'afaigaluega ni tagata faigaluega talafegai, su'esu'e pe va'ava'aia fo'i

O sauaga tau feusua'iga fai fa'amalosi ma le fa'apalopalo ogaoga sa ono tula'i mai i so'o se taimi i le a'oga ona o le lava o le aufaigaluega i fale o le nofo tumau lea e ono mafai ona latou maitauina pe va'ava'aia amioga a isi tagata faigaluega. Sa le faia fo'i ni su'esu'ega au'ilili pe va'ava'aia fo'i le aufaigaluega sa faia sauaga. O lona i'uga, sa fa'afaigaluega pea ma le le mautinoa e le a'oga tagata faigaluega sa faia ia sauaga. E latalata atu i le 30 tausaga tu'ufa'atasi le piliota e le'i nofo va'ava'aia ai ni faife'au se to'alua ma sa la'ua faia sauaga tau feusua'iga fai fa'amalosi i le tele o tamaiti a'oga.

E ui o le faiga fa'avae fa'ato'a amata toe papa'u, na silafia lelei e le aufaigaluega i le vaitau o Conolly e le tatau ona latou iai na o latou ma se tamaitiiti a'oga i se taimi umi. Peita'i, o lena tulaga e le'i fa'amalosi, e le'i mata'ituina fo'i gaiogiga a le aufaigaluega, ma o le tele o le taimi na ave'ese ai e le aufaigaluega tamaiti a'oga mai le a'oga ma e la'itiiti lava se va'ava'aiga na iai.

I le vaitau o Conolly, Parr ma Wilton, na te'ena ai e le a'oga ni manatu fa'aalia e uiga i ni popolega ma ni faitioga e fa'asaga i le aufaigaluega, ma fa'ailoa ai lo latou manatu fa'apitoa i le aufaigaluega na i lo le puipuiga o tamaiti a'oga.

## Fa'atamala e fa'amautinoa le a'oa'oina ma le toe fa'aleleia o le atina'ega o tomai ma agava'a o le aufaigaluega

E le'i saunia e le Fono Fa'atonu ma ta'ita'i o le a'oga ni a'oa'oga su'e tomai ma ni atina'e e a'oa'o ai le aufaigaluega i mata'upu o sauaga tau feusua'iga fai fa'amalosi i fanau ma faiga fa'avae mo faitioga. O i'ina na iloa ai le itiiti o le malamalama a le aufaigaluega i le natura ma le lautele o sauaga tau feusua'iga fai fa'amalosi i fanau. E le'i lava ni ta'iala talafeagai e maua ai ni fa'ailo o sauaga, ma alagatau ona iai o ni ta'iala talafeagai, ma iloa ai ni auala e su'esu'e ma tu'uina atu ai ni fesoasoani i tamaiti a'oga na sauaina. E le'i iai fo'i se ta'iala mo le aufaigaluega i ni la'asaga e faia pe a faitio atu se tamaitiiti a'oga ia i latou e uiga i se sauaga tau feusua'iga fai fa'amalosi na faia e se isi tagata ia i latou.

## Fa'atamala e fa'ailoa vaivaiga i le faiga o sikolasipi

Na fa'atamala le Fono Fa'atonu e fa'asaga i ni vaivaiga i le faiga o a latou sikolasipi, lea na mafai ai ona ave'esea fa'afuase'i, ma fa'amalolo ai tamaiti a'oga e aunoa ma se faiga agatonu ma ave'a ma auala ua le una'ia ai ni faitioga matuia e aumai e i latou po'o o latou matua. O lena faiga fa'avae e le'i o gatasi ma ta'iala mo a'oga a le malo lea e amana'ia ai le ono suia o amio a tamaiti e afua mai i sauaga. Na onsa'ia pea e tamaiti a'oga, ona e le'i manana'o e fai i latou ma avega mamafa i le itu tau seleni i o latou matua.

## Aotelega

O nei vaega uma ua tusilima i se fa'aiuga e fa'apea, o le tauaofa'i mai ai o Fono Fa'atonu uma na fa'aalia lo latou fa'atamala i le tele o tausaga e taofia sauaga fa'ao'olima tuga, sauaga tau feusua'iga fai fa'amalosi ma le fa'apalopalo i tamaiti a'oga i le A'oga a Dilworth. Na fa'atamala fo'i e su'esu'e lelei faitioga pe fa'atinoina foi ni su'esu'ega pe leai fo'i, na fa'atamala e fesoasoani i tamaiti na faia ia faitioga o sauaga pe sa'ili pe na iai ma nisi tamaiti na a'afia, fa'atamala e lipoti faia'oga na faia ia sauaga i leoleo, ma le Matagaluega o A'oga, lea na mafua ai ona lamatia tamaiti a'oga o isi a'oga, ma fa'atamala fo'i e fai ni faiga fa'avae ma mata'itu ia fa'amausaliina le sa'oloto o tamaiti a'oga mai sauaga ma le fefe ma mafai ai ona latou maua atoatoa le ola taumafai i le a'oga ma avanoa na ofo atu e le mavaega a James Dilworth. Na tu'uina atu e le Fono Fa'atonu le tele o matafaioi i pule a'oga ma le aufaigaluega sinia e fa'atautaia ai le a'oga, ae sa fa'atamala e fa'atonu ma va'aia i latou, na fa'atamala e ano i fa'ailoga fa'aalia so'o ma faitioga e fa'atautu i sauaga ma ia fa'amautinoa o lo'o latou faia ni auala sili ona lelei mo le puleaina o le a'oga e ala i le fa'aaogaina o tomai ma fautuaga o lenei vaitau.

## O le A'oga a Dilworth i le taimi nei

Na amata galue Mr Reddix o le pule a'oga i a Aperila i le tausaga 2019. O lana fe'au i le aufaigaluega, matua ma tamaiti a'oga na ia fa'amamafa ai le taua o le manino ma le fa'amaoni.

I le mae'a ai ona faia o ni faitioga e uiga i sauaga tau feusua'iga fai fa'amalosi e tama tuai i le Ekalesia Egelani ma pasi atu i leoleo i le 2019, na fautuaina ai e le a'oga leoleo ma amata ai loa se su'esu'ega tele. Na fa'atuina e le a'oga se Auaunaga Fa'alogo e maua ai se foma'i o le mafaufau mo tama tuai e leai se totogi ma sa feiloa'i fo'i le ta'ita'ifono o le Fono Fa'atonu ma le pule a'oga ma tama tuai pe a talosagaina, ma fa'alogo i sauaga na feagai ma i latou ma ave iai le fa'ato'esega.

Na amata e le a'oga se galuega sili ona auili'ili ina ia maua ai se fa'amaoniga o le a'oga ia avea ma A'oga ua Atamai i Tamaiti,<sup>21</sup> na mafua ai ona tele ma loloto le suiga i tu ma aga masani a le a'oga.

O lenei fa'amaoniga na mafai ai ona auai le a'oga i se iloiloga au'ili'ili e uiga i le saogalemu o tamaiti. O lenei faiga e aofia ai le iloiloina o pepa o fa'amatalaga, fa'atalanoaga o ta'ita'i o le a'oga, ma tamaiti a'oga, aiga, tau aiga ma le aufaigaluega na a'afia ai. Na maua lea fa'amaoniga i a Setema 2022.

21 O le Atamai i Tamaiti A'oga o se fa'alapotopotoga na fa'avaeina i totonu o Ausetalia e galulue fa'atasi ma le malo, fa'alapotopotoga tuma'oti ma kamupani i Asia ma le Pasefika e fausia ni nofoaga ma ni aganu'u saogalemu mo tamaiti.



O lenei fa'amaoniga ua mautinoa ai o le A'oga a Dilworth o se a'oga e:

- fa'amuumua ai le saogalemu o tamaiti a'oga i totonu o lana ta'ita'iga fa'alefa'alapotopotoga, pulega ma tu ma aga;
- o tamaiti ma talavou ua fa'ailoa iai a latou aia tatau, e auai i fa'ai'uga e a'afia ai i latou ma ua amana'iaina;
- o aiga ma fa'alapotopotoga ua logo ma ua auai i le saogalemu o tamaiti ma lo latou ola manuia;
- o faiga tutusa ua lagolagoina ma ua fa'aaloogia fo'i fa'asinomaga ese'ese i ta'iala ma vaega fa'atino:
- o tagata e galulue ma talavou e fetau lelei ma lagolagoina e atagia ai le saogalemu o fanau;
- ua iai faiga fa'avae ma ta'iala mo faitioga ma popolega;
- ua fa'aa'upegaina le aufaigaluega ma tagata e galulue le totonu i tomai, agava'a ma le malamalama e puipuia ai talavou i a latou meaa'oga ma a'oa'oga fa'aauau;
- o si'osi'omaga fa'aletino ma luga o upegatafa'ilagi o lo'o fa'alauiloga ai le saogalemu ma le ola manuia ae fa'aitiitia ai le avanoa e ono a'afia ai tamaiti a'oga;
- le fa'atinoga o tulaga maualuga ia faia pea lona iloiloga ma fa'aleleia; ma ia fa'amauina faiga fa'avae ma ta'iala o lo'o fa'ailoa mai ai pe fa'apefea ona fa'atino e le A'oga a Dilworth ni faiga e saogalemu ai ana tamaiti a'oga.

I le ma lea, o lea ua atia'e e le A'oga a Dilworth ana faiga fa'avae mo faitioga e galulue vavalalata ai ma tamaiti a'oga, aiga, ma tau aiga ia matuinoa ai lona talafeagai. E lua ona fa'amoemoe: ia maua ai e tamaiti a'oga, o aiga ma tau aiga le avanoa e fai ai ni faitioga i se faiga e fa'alauiloga ai aia tatau a tamaiti a'oga, matafaioi, saogalemu ma le ola manuia ma ia mautinoa ua malamalama tagata uma i ni mea e ono maua mai ai. E iloa ai fa'atinoga na fai ma pa pupuni i le faiga o faitioga ma la'asaga e faia e le a'oga e ave'esea ai. E aofia ai fo'i auala e faigofie ona fa'aaoga fa'alilolilo mo tamaiti a'oga e lipoti ai o latou popolega, faiga e mata'itu ai gaioiga a tamaiti a'oga ma le fa'amauina o fa'amatalaga taua e uiga i tamaiti a'oga ma le tausiga o i latou e le a'oga.

O lea ua iai nei le Ta'iala o le Puipuiga o Tamaiti A'oga ma le Saogalemu o Tamaiti A'oga: Tulafono o le Amio mo le Aufaigaluega lea ua avea ma vaega o le fa'afeiloa'iga o faia'oga fou, fesoasoani lautele ma le tausia o le soifua maloloina atoa ai ma se fuafuaga o le pulea o le va feagai ai ma le a'oga lea e lagolago ai amioga lelei mo le ola a'oa'oina ma le ola manuia.

O a matou talanoaga ma tamaiti a'oga o lo'o iai nei ma o latou aiga ua fa'ailoa ai se talitonuga malosi e fa'apea o lea ua malu puipuia tamaiti a'oga, ma ua leai se avanoa o toe tu'ua i so'o se sauaga e aofia ai le fa'apalopalo, ma ua iai nei lo latou talitonuga i le pule a'oga ma le aufaigaluega. O le popolega o totoe e aofia ai le le mafai lea ona maua o se avanoa o matua i le Fono Fa'atonu, ma le tulaga fa'anoanoa ona o le a'afiaga o le tala fa'asolopito o sauaga fa'ao'olima tuga, sauaga tau fesusia'iga fai fa'amalosi ma le fa'apalopalo i tamaiti a'oga o lenei vaitau.

## Fa'ai'uga

Matou te fa'amalo atu i le a'oga mo le galuega sa fai e maua ai le fa'amaoniga o le A'oga ua Atamai i Tamaiti, e foliga mai ua mafua ai ona iai se suiga taua tele i tu ma aga a le a'oga ma e tataua ona uiga ese le fa'aititia ai o le avanoa e toe sauaina ai tamaiti a'oga.

O vaega na matou maua na mafua ai sauaga lea ua mae'a ona fa'atalanoaina, ma ua lava i le tulaga o le Fono Fa'atonu. E mo'omia se taimi ona mautu lea o lea o tu ma aga fou i le a'oga, ma e mo'omia le va'aia lelei pea o nei suiga ua ta'ua ia fa'atumauina.

